

मार्निंग डोगरी न्यूज़ बुलेटिन, समे. **09-20** Hrs

<><><><><><>

Headlines

- केन्द्री गृह मंत्री अमित शाह होर जम्मू कश्मीर च नमें आपराधिक कनूनें दी अमलावरी दी समीक्षा करगन।
- लेफिटनेंट गवर्नर मनोज सिन्हा होरें आखेआ ऐ जे सेना बन्ने पर कुसै बी चाल्ली दी चुनौती दा मकाबला करने लेई पूरी चाल्ली तैआर ऐ।
- उपमुख्यमंत्री सुरिन्दर चौधरी होरें आखेआ ऐ जे दरेयाएं-खड्डें चा गैर कनूनी तौरा पर लेतर बज्जरी कड्डने आले कन्नै सख्ती नै निबड्डेआ जाग।
- राष्ट्र व्यापी पैहल “नक्शा” तैह्त जम्मू कयमीर दे 4 शैहरी मकामी निकाएं च जिमिएं दे सर्वेक्षण दा कम्म शुरू कीता जाग।
- राष्ट्रीय आपदा प्रबंधन प्राधिकरण एनडीएमए आस्सेआ जम्मू ब्हाई अड्डे नी भूचाल औने पर आपातस्थिति कन्नै निबड्डेने दा दऊं दिनें दा म्यास कीता जाग।

<><><><><><>

HM JK Criminal Laws

केन्द्री गृह मंत्री अमित शाह होर अज्ज जम्मू कश्मीर दे उपराज्यपाल मनोज सिन्हा ते मुख्यमंत्री उमर अब्दुल्ला हुंदी मजूदगी च केन्द्र शासत प्रदेश च नमें अपराधिक कनूनें दी अमलावरी दी स्थिति दी समीक्षा करगन। इस बैठका च मुख्य तौरा पर ध्यान पुलस, जेलें, अदालतें, कनूनी कारवाइएं ते फोरेंसिक जांच सरबंधी बवस्थाएं दी मजूदा स्थिति पर केन्द्रित रौहग। टकोहदा करियै नमें कनूनें दी पछोकडे च जिंदे च 2023 आली भारतीय न्याह संहिता बीएनएस 2023 आली भारतीय नागरिक सुरक्षा संहिता बीएनएसएस ते 2.23 आली गै भारतीय साक्षय अधिनियम बीएसए शामिल न, जेहडे पैहले आले आईपीसी, सीआरपीसी ते भारतीय साक्षय कनून दी थाहर लागू कीते गे न। इस बैठक च केन्द्र ते जम्मू कश्मीर सरकारै दे बड्डे अधिकारी बी मजूद रौहगन।

<><><><><><>

LG Border

नियंत्रण रेखा पर हाल च बन्ने पारा गोली बारी ते आईईडी हमले दिएं घटनाएं दी पच्छोकड़े च उपराज्यपाल मनोज सिन्हा होरें जोर देइयै आखेआ ऐ जे भारतीय फौज बन्ने पर पैदा होने आली कुसै बी चुनौती कन्नै असरदार ढंगै नै निबड़ने दी पूरी समर्थ रखदी ऐ ते बन्ने पारा कुसै बी चाल्ली दी हिमाकत दा कन्नो कन्नी बनकदा परता दित्ता जा'रदा ऐ। कल जम्मू च इक समारोह दे बाहरें पत्रकारें कन्नै गल्ल करदे होई उपराज्यपाल होरें आखेआ जे आतंकवाद विरोधी कारवाइयां उपरोतली जारी राँहगन ते खित्ते च पूरी रमानदारी ते सुरक्षा बवस्था बनाई रखने, सुरक्षा अजेंसिएं गी आतंकवाद दा समूलचा नास करने लेई निर्देश दित्ते गेदे न...

उपराज्यपाल हुंदा एह ब्यान 11 फरवरी गी अखनूर सेक्टर च आईईडी हमले जेहदे च इक कैप्टन समेत दऊं फौजी शहीद होइ गे हे ते राजौरी पुंछ जिले च बन्ने पारा गोलीबारी दिएं घटनाएं जिंदे च दऊं सैनिक घायल होई गे हे ते बरूदी सुरंग फट्टने आली घटना जेहदे च इक होर सुरक्षा कर्मी घायल होई गेदा, दी पच्छोकड़े च आया ऐ।

<><><><><><>

LG Reddy Meet

जम्मू कश्मीर च आर्थिक विकास गी होर बढ़ावा देने दे मकसद कन्नै उपराज्यपाल मनोज सिन्हा होरें कल नमीं दिल्ली च कोयला ते खन्ने सरबन्धी केन्द्री मंत्री जी.किशन रेड्डी हुंदे नै मलाटी कीती ते केन्द्र शासत प्रदेश च खनिजें दा पता लाने दिएं संभावनाएं दे बारे च चर्चा कीती। केन्द्र मंत्री होरें अपनी इक सोशल मीडिया पोस्ट पर लिखेआ ऐ जे इस बैठक दा मुख्य मकसद जम्मू कश्मीर च मजूद खनिजें दे सगगोसार वसीले दा सेही ढंगै सिर इस्तेमाल करदे होई इत्थूं दे आर्थिक विकास गी रफ्तार देना ऐ। गल्लबात दरान खनाने दे क्षेत्र गी बढ़ावा दिंदे होई आर्थिक विकास गी बढ़ावा देना ते कन्नै कम्म रोजगार दे नमें ते मते मौके पैदा करने पर चेचे तौरा पर चर्चा कीती गई। केन्द्री मंत्री ते उपराज्यपाल होरें खनिज कड़्डने ते इंदा केन्द्र शासत प्रदेश दे फायदे लेई सलीके सिर इस्तेमाल करने दे बक्ख-बक्ख पैहलुएं पर बचार बंटादरा कीती।

<><><><><><>

Dy. CM Illegal Mining

उपमुख्यमंत्री सुरिन्दर चौधरी होरें आखेआ ऐ जे सरकार दरयाएं ते खड्डें चा गैर कनूनी तौरा पर लेतर बज्जरी कड़्डने गी दना वरदाश्त नेई करोग ते इस कम्में च मलव्वज जां सैहयोग करने आलें गी बी बख्खोआ नेई जाग।

भाएं ओ कोई आम आदमी जां सरकारी अफसर गै कीह् नेई होवै। कल बारामुला च विकास कम्मं दा जायजा लैने लेई सददी गेदी इक बैठक दे बाहरें पत्रकारें कन्नै गल्ल करदे होई उपमुख्यमंत्री होरें आखेआ जे इनें गैर कनूनी गतिविधिएं पर रोक लाने दा प्रशासन दा घेइया पक्का ऐ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह् 119मीं किश्त होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800-11-7800 पर भेजी सकदे न। एह्दे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह् कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एह्दे कन्नो कन्नी एह्दा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एह्दा डोगरी च अनुवाद प्रसारत कीता जाग।

<><><><><><>

NAKSHA-JK

केन्द्री मंत्री शिवराज सिंह चौहान होर अज्ज मध्यप्रदेश दे रायसेन च राष्ट्री भू-स्थानिक जान आधारित शैहरी आवास भूमि सर्वेक्षण “नक्शा” दा उद्घाटन करगंन। एह् परियोजना 26 राज्यें ते 3 केन्द्र शासत प्रदेशें दे 152 शैहरी मकामी विकास च शुरू होग। आकाशवाणी जम्मू संवाददाता नै दस्सेआ ऐ जे 194 करोड़ दी केन्द्री सरकार आस्सेआ माली मदाद कन्नै एह् कार्यक्रम जम्मू कश्मीर दे 4 शैहरी मकामी निकाये च शुरू कीता जाग। जेह्दे च बिश्नाह, कटरा, अवन्तिपुरा ते पट्टन शामिल न। इस पैहल दा मकसद शैहरी जमीन दा रिकार्ड बनाने ते उसी समे-समें सिर नमीं जानकारी साहबै बदलना, जमीनी हकूकें दी सेही कागजी कारवाई गी पक्का करना, शैहरी विकास सरबन्धी योजना गी बेहतर बनाना ते जमीन कन्नै जुड़े दे मसलें घट्ट करना ऐ। जिमीं संसाधन विभाग ते ग्रामीण विकास केन्द्री मंत्रालय नै एह् पायलट कार्यक्रम शुरू कीता ऐ। एह्दे उद्घाटन समारोह च ड्रोन डोआरी भरगंन, परियोजना दे तैहत कियां कम्म कीता जाना चाहिदा, एह्दे सरबन्ध च एसओपी किताबचा लांच कीती जाग ते नक्शा वीडियो ते पलायर बी दस्सी जाग।

<><><><><><>

Mock Exercise

राष्ट्रीय आपदा प्रबंधन प्राधिकरण एनडीएमए, जम्मू ब्हाई अड्डे पर कुसै इमरजेंसी आली स्थिति च किस चाल्ली दी कारवाई कीती जाई सकदी ऐ, दे बारे च दऊं दिनें दी मॉक ड्रिल यानि झूठे मूठे दा भ्यास करोग, जेहदा मुख्य केन्द्र भूचाल औने दी स्थिति च कीती जाने आली कारवाईएं पर आधारित रौहग। एह आयोजन जम्मू कश्मीर आपदा प्रबंधन प्राधिकरण ते भारतीय ब्हाई अड्डा प्राधिकरण दे सैहयोग कन्नै कीता जा'रदा ऐ जेहदा मकसद भूचाल औने दी स्थिति च कुस-केहड़े घरै दी केह भूमका रौहग, एहदे बारे च स्पष्टता कन्नै उजागर करना ऐ। इस भ्यास च मुख्य तौरा पर घटना पर प्रतिक्रिया सरबंधी सरिस्ते ते लोकें च जागरूकता पैदा करने पर दिक्ता जाग। एह भ्यास इक चाल्ली कन्नै तैआरिएं, बवस्थाएं, राहत प्रक्रियाएं दा मूलाकन करने दे कन्नो कन्नी जित्थें कुदरै कोई कमी पेशी रेही दी होग, उसी दूर करने पर केन्द्रित होग।

<><><><><><>

Court Complex Akhnoor

न्यायिक बवस्था तैहत ढांचागत सुविधाएं च बाद्धा ते बेहतरी बक्खी होर अगड़े बधदे होई जम्मू कश्मीर ते लददाख हाई कोर्ट दे मुख्य न्यायधीश ताशी राबस्तन होरें कल अखनूर च मुनसिफ अदालत परिसर दा उदघाटन कीतां इस मौके उंदे कन्नै जस्टिस संजीव कुमार शुकला बी मजूद हे। इस मौके चीफ जस्टिस होरें आखेआ जे लोकें तगर सुवधाजनक तरीकें कन्नै न्याह पजाना जकीनी बनाने लेई अदालतें च ढांचागत ते आधुनिक तकनीकी सुविधाएं ते सेवाएं दा बड़ा मता महत्व ऐ। आकाशवाणी कन्ने इस बारे गल्ल करदे होई जस्टिस संजीव कुमार शुकला होरें आखेआ.....

<><><><><><>

Divya Kala Mela

रचनात्मकता ते हुनर दे बाद्धे विकास आस्तै जम्मू च दिव्य कला मेला चला'रदा ऐ। दिव्यांगे दे सशक्तिकरण सरबंधत मैहकमे आस्सेआ आयोजित इस मेले च पूरे देशै थमां आए दे दिव्यांगें दी कला ते हुनर गी दर्शाया जा'रदा ऐ। जियां हत्थें कन्नै बनाए गेदे उत्पाद जेहड़े दस्तकारी दे दूई रचनात्मक कला दे बेहतरीन नमूने पेश करा'रदे न। इस मेले ते दिव्यांगे गी अपनी कला गी सामने आन्नने ते आजीविका कमाने आस्तै इक मंच प्रदान कीता ऐ। जेहदे कन्नै इंदे समावेश ते सशक्तिकरण दा धेइया पूरा होंदा ऐ। इक कलाकार नै अपना तर्जुबा सांझा करदे होई दस्सेआ.....

<><><><><><>